

OBRADA I ZAŠTITA LIČNIH PODATAKA U BOSNI I HERCEGOVINI

**THE PROCESSING AND PROTECTION OF PERSONAL DATA IN
BOSNIA AND HERZEGOVINA**

Pregledni znanstveni rad

*Bojan Gavrilović, MA**

Sažetak

Kroz ovaj rad, sa stanovišta Zakona o zaštiti ličnih podataka Bosne i Hercegovine, nastojeće se prikazati i definisati osnovni pojmovi o obradi i zaštiti ličnih podataka za koje je nadležna Agencija za zaštitu ličnih podataka. Uvažavajući činjenicu da zaštita podataka predstavlja jedno od vodećih sigurnosnih pitanja današnjice, nameće se i motiv za obradom ove teme. Deskriptivnom metodom ključnih pojmova iz ovog Zakona ukazaće se na važnost čuvanja ličnih podataka, te tako opisivanjem i objašnjenjem ili eksplikacijom istih doprinijeti društvenoj zajednici. Predmet i zadatak ovog rada je objasniti osnovne pojmove o pravima na privatnost, tj. o zaštiti ličnih podataka i njihovoj obradi, kao i nadležnosti i ovlašćenjima Agencije zadužene za provedbu ovih radnji. Cilj je skrenuti pažnju javnosti na značaj ličnih podataka i tako je podstaknuti na čuvanje istih.

Ključne riječi: lični podatak, obrada, kontrolor, obrađivač, zaštita ličnih podataka.

Abstract

From the point of view of the Law and Personal Data Protection of Bosnia and Herzegovina, in this paper we will try to present and define the basic terms on the processing and protection of personal data for which the Personal Data Protection Agency is responsible. Acknowledging the fact that the protection of personal data represents one of the leading security issues of today is also a motive for processing this topic. The descriptive method of the key terms from this Law will indicate the importance of keeping personal data,

** Služba za zajedničke poslove Vlade Republike Srpske, e-mail: bojang82@gmail.com*

thus contributing to the social community by describing and explaining or explicating the same. The theme and task of this paper is to explain the basic concepts of privacy rights, the protection of personal data and their processing, as well as the competences and authorizations of the Agency responsible for the implementation of these actions. The goal is to draw the public's attention to the importance of personal data and thus encourage them to keep it.

Keywords: personal data, processing, controller, processor, protection of personal data.

1. UVOD

Kada se govori o zaštiti privatnosti, zaštita ličnih podataka predstavlja jedno od osnovnih pravila funkcionisanja demokratskog društva. Norme koje se odnose na zaštitu privatnosti definisane su u Univerzalnoj deklaraciji o ljudskim pravima UN* i Evropskoj konvenciji o zaštiti ljudskih prava i sloboda Vijeća Evrope*. Ustav Bosne i Hercegovine garantuje zaštitu ljudskih prava i sloboda predviđenih ovom Konvencijom, te su tako zakoni BiH usklađeni sa istom. Usklađenost se ogleda u vidu obrade i zaštite ličnih podataka, pa tako prema Brkiću i Dizdareviću (2021, cit. str. 171) pojedini izrazi sadržani u Zakonu o zaštiti ličnih podataka ("Službeni glasnik BiH", br. 49/06) imaju sljedeća značenja:

- Lični podatak - podrazumijeva se bilo koja informacija koja se odnosi na fizičko lice koje je identifikovano ili može da se utvrdi identitet lica.
- Nosioc podataka je fizičko lice čiji identitet može da se ustanovi ili identifikuje, neposredno ili posredno, naročito na osnovu jedinstvenog matičnog broja, te jednog ili više faktora karakterističnih za fizički, fiziološki, mentalni, ekonomski, kulturni ili socijalni identitet tog lica.
- Posebne kategorije podataka - svi lični podaci koji otkrivaju rasno, nacionalno ili etničko porijeklo, političko mišljenje ili stranačku pripadnost, članstvo u sindikatima, religiozno, filozofsko ili drugo

* *Opšta deklaracija o ljudskim pravima, usvojena i proglašena na opštoj skupštini UN 10.12.1948. god., (rezolucija br. 217 /III/).*

* *Evropska konvencija o zaštiti ljudskih prava i sloboda je najstariji i najučinkovitiji međunarodni ugovor za zaštitu ljudskih prava u svijetu. Potpisan je u Rimu, 04.11.1950. god.*

uvjerenje, zdravstveno stanje, genetski kod i seksualni život, krivične prijave i biometrijske podatke.

Istraživačka pitanja proizilaze iz samog Zakona o zaštiti ličnih podataka i glasila bi:

1. Na koga se odnosi primjena Zakona o zaštiti ličnih podataka?
2. Pod čijom je ingerencijom zaštita ličnih podataka u BiH?

Prema navedenom, proizilaze i hipoteze rada:

Generana hipoteza: - Zaštita ličnih podataka predstavlja temeljno pravo na privatnost zaštićeno Evropskom konvencijom o zaštiti ljudskih prava i sloboda.

Pojedinačna hipoteza 1: - Obradu ličnih podataka mogu vršiti kontrolor i obrađivač u okviru svoje nadležnosti, samo na pravičan i zakonit način.

Pojedinačna hipoteza 2: - Zaštita ličnih podataka u svakom momentu mora biti osigurana odgovarajućim tehničkim i organizacionim mjerama.

Rad se sastoji iz tri osnovna poglavlja, kao i niza podpoglavlja kroz koja će se objasniti pojmovi sadržani u Zakonu o zaštiti ličnih podataka BiH.

- ✓ U prvom poglavlju će se izvršiti definisanje Agencije i prikazivanje njenih nadležnosti i ovlašćenja.
- ✓ U drugom poglavlju će biti riječi o obradi ličnih podataka i njenim sastavnim dijelovima.
- ✓ U trećem i posljednjem poglavlju prikazaće se mjere zaštite i nadzor nad obradom ličnih podataka.

2. AGENCIJA ZA ZAŠTITU LIČNIH PODATAKA BOSNE I HERCEGOVINE

Parlamentarna skupština Bosne i Hercegovine, na osnovu člana IV.4.a) Ustava Bosne i Hercegovine, na 79. sjednici Predstavničkog doma, održanoj 17. maja 2006. godine, i na 58. sjednici Doma naroda, održanoj 23. maja 2005. godine, usvojila je Zakon o zaštiti ličnih podataka (PSBiH, br. 308/06, "Službeni glasnik BiH" br. 49/06, 76/11, 89/11). Članom 1. (Predmet Zakona) ovog Zakona osnovana je Agencija za zaštitu ličnih podataka u Bosni i Hercegovini i utvrđena njena nadležnost, organizacija, upravljanje i druga pitanja važna za njen rad i zakonsko funkcionisanje. Agencija za zaštitu ličnih

podataka BiH (www.azlp.ba) je samostalna upravna organizacija. Nadležna je za:

- ✓ nadgledanje provođenja odredbi Zakona o zaštiti ličnih podataka i drugih zakona o obradi ličnih podataka,
- ✓ postupanje po podnesenim prigovorima nosioca podataka,
- ✓ podnošenje Parlamentarnoj skupštini BiH godišnjeg izvještaja o zaštiti ličnih podataka, koji treba biti dostupan javnosti,
- ✓ praćenje uslova za zaštitu ličnih podataka davanjem prijedloga za usvajanje ili izmjenu zakona koji se odnose na obradu ličnih podataka, te davanje mišljenja o prijedlozima tih zakona i briga o ispunjavanju kriterija zaštite podataka koji proističu iz međunarodnih sporazuma obavezujućih za Bosnu i Hercegovinu.

Ovlašćena je da:

- ✓ posredstvom inspekcije nadzire ispunjavanje obaveza propisanih Zakonom o zaštiti ličnih podataka,
- ✓ vodi glavni registar,
- ✓ prima primjedbe i prigovore od strane građana koje se odnose na kršenje ovog Zakona,
- ✓ nalaže blokiranje, brisanje ili uništavanje podataka, privremenu ili trajnu zabranu obrade, upozorava ili opominje kontrolora,
- ✓ podnosi zahtjev za pokretanje prekršajnog postupka u skladu sa ovim Zakonom,
- ✓ daje savjete i mišljenja u vezi sa zaštitom ličnih podataka,
- ✓ saraduje sa odgovarajućim organima u drugim državama,
- ✓ obavlja druge dužnosti propisane zakonom,
- ✓ nadzire iznošenje podataka iz Bosne i Hercegovine,
- ✓ izrekne kaznu u okviru prekršajnog postupka, u skladu sa ovim Zakonom.

Agencijom rukovodi direktor Agencije, koji je za svoj rad i rad Agencije odgovoran Vijeću ministara BiH*. Vijeće ministara u skladu sa Zakonom o ministrima i drugim vladinim imenovanjima imenuje direktora na mandat u

** Vijeće ministara BiH je izvršni organ vlasti. Sastoji se od deset članova, predsjedavajućeg vijeća ili premijera i devet ministara.*

trajanju od četiri godine, uz mogućnost ponovnog imenovanja. Kandidat za direktora mora ispunjavati posebne uslove u vidu:

- diplomiranog pravnika,
- pet godina radnog iskustva na rukovodećim poslovima u upravi,
- dokazanog iskustva u oblasti poštovanja ljudskih prava,
- priznatog visokog moralnog statusa.

3. OBRADA LIČNIH PODATAKA

Kako bi se objasnio sam postupak obrade podataka i ušlo u dalju analizu obrade istih, neophodno je prikazati i definisati tri osnovna i ključna termina: korisnik, kontrolor i obrađivač. U Zakonu o zaštiti ličnih podataka (član 3., Definicije) ovi termini su objašnjeni.

- a) Korisnik je fizičko ili pravno lice, javni organ, agencija ili drugi organ kojem se omogućava pristup ličnim podacima ili kojem se lični podaci mogu dati na korišćenje.
- b) Kontrolor je svaki javni organ, fizičko ili pravno lice, agencija ili drugi organ koji samostalno ili zajedno sa drugim vodi, obrađuje i utvrđuje svrhu i način obrade ličnih podataka na osnovu zakona ili propisa.
- c) Orađivač je fizičko ili pravno lice, javni organ, agencija ili drugi organ koji obrađuje lične podatke u ime kontrolora.

Pod obradom ličnih podataka podrazumijeva se bilo koja radnja ili skup radnji koje se vrše nad podacima. U te radnje spadaju prikupljanje, unošenje, organizovanje, pohranjivanje, izmjena, uzimanje, konsultovanje, korištenje, prenos, svrstavanje, pristup, blokiranje, brisanje i uništavanje. Lični podaci mogu se isključivo prikupljati u svrhu koja je skladu sa zakonom uz prethodno obavještenje ispitanika. Dalje se obrađuju na pravičan i zakonit način samo u mjeri i obimu neophodnim za ispunjenje određenog cilja. Orađuju se samo autentični i tačni lični podaci i vrši se njihovo ažuriranje kada je potrebno. Lični podaci koji su netačni i nepotpuni, a ne odgovaraju svrsi kojoj su prikupljeni brišu se. Član 5. (Saglasnost) Zakona o zaštiti ličnih podataka govori da kontrolor lične podatke može obrađivati samo uz saglasnost nosioca podataka. Saglasnost mora biti u pisanoj formi i potpisana od strane nosioca podataka, mora sadržavati tačnu naznaku podataka u vezi sa kojom se saglasnost daje i mora biti naznačeno ime kontrolora, svrha i vremenski period na koji se saglasnost daje. Saglasnost može biti povučena u bilo kojem

trenutku, sem ako se nosilac podataka i kontrolor drugačije ne dogovore. Na zahtjev nadležnog organa, kontrolor u svakom trenutku mora dokazati saglasnost za period obrade ličnih podataka. Kako je navedeno u tački 5. ovog Zakona, dolazi se do zaključka da prilikom prikupljanja i obrade ličnih podataka mora se voditi računa o sljedećem:

- prikupljanje i obrada ličnih podataka vrše se samo u vremenskom periodu koji je neophodan za izvršenje svrhe prema kojoj su podaci prikupljeni,
- lični podaci moraju se čuvati u formi koja dopušta identifikovanje nosioca podataka, ali ne duže nego što je potrebno za svrhu za koju se podaci prikupljaju i obrađuju,
- prikupljeni lični podaci u različite svrhe moraju biti osigurani, ne smiju se objediniti ili kombinovati.

3.1. Obrada posebnih kategorija ličnih podataka

Posebna kategorija ličnih podataka, odnosno lični podaci koji se odnose na rasno ili etničko porijeklo, političku orijentaciju, vjerska ili druga opredjeljenja, sindikalno članstvo, pol, krivičnu i prekršajnu evidenciju Zakon izričito zabranjuje.

Međutim, član 9. Zakona (Obrada posebnih kategorija podataka) prikupljanje i obrada posebnih kategorija ličnih podataka daje izuzetak.

Ovim članom dozvoljeno je prikupljanje i obrada u uslovima: ako je nosilac dao saglasnost, ako je obrada neophodna da bi se zaštitio život, zdravlje, imovina i drugi vitalni interesi nosioca podataka, da bi se izvršila obaveza ili posebna prava kontrolora iz oblasti radnog prava, ako se obrada vrši za potrebe preventivne i dijagnostičke medicine i upravljanja medicinskim uslugama, da se vrši u okviru zakonitih aktivnosti ustanove, fondacije, udruženja ili druge neprofitne organizacije sa političkim, filozofskim, religioznim i drugim ciljevima pod uslovom da se obrada podataka vrši isključivo nad članovima tih organa i lica koja sa njima intenzivno komuniciraju, ako je nosilac podataka jasno učinio javnim lične podatke i ako je obrada od posebnog javnog interesa.

3.1.1. Povjeravanje poslova obrade ličnih podataka

Kontroloru je dozvoljeno povjeravanje obrade ličnih podataka drugoj fizičkoj ili pravnoj osobi, odnosno obrađivaču pod uslovom da je isti registrovan za obavljanje navedene djelatnosti i da ima dovoljne garancije u smislu ostvarivanja svih mjera zaštite ličnih podataka. Sa obrađivačem se zaključuje ugovor u pisanoj formi, gdje se navode obim, svrha i rok na koji je sporazum zaključen, kao i garancije obrađivača u vezi tehničkih i organizacionih mjera zaštite ličnih podataka. Prilikom vršenja poslova obrade, obrađivač ne može da prenosi svoje odgovornosti na druge obrađivače ukoliko za to ne dobije saglasnost kontrolora.

3.1.2. Informisanje nosioca podataka o prikupljanju podataka

Ukoliko nije ranije obavješten, kontrolor je dužan da prije početka prikupljanja ličnih podataka o tome obavijesti nosioca podataka. Obavještenje o prikupljanju podataka (Član 22.) Zakona o zaštiti ličnih podataka nalaže kontroloru da obavijesti nosioca podataka o sljedećem:

- a) svrsi obrade, kontroloru, prijemnom organu ili trećoj strani* kojoj će podaci biti dostupni,
- b) o zakonskoj obavezi dostavljanja podataka za obradu i posljedicama u slučaju da nosilac podataka odbije obavezu,
- c) o situacijama kada nosilac podataka ima pravo odbiti dostavljanje ličnih podataka,
- d) da li je prikupljanje ličnih podataka na dobrovoljnoj osnovi, da li postoji pravo pristupa i pravo ispravke podataka koji se na njega odnose.

Kontrolor nije dužan da saopšti obavještenje o obradi ličnih podataka u slučajevima kada se radi o:

- 1) obradi ličnih podataka u statističke, naučnoistraživačke i arhivske svrhe,
- 2) činjenici da su podaci bili pohranjeni u tajnosti na osnovu zakona, vrste i opravdanog interesa treće strane,
- 3) obradi ličnih podataka uz saglasnost nosioca podataka.

** Treća strana je bilo koje fizičko ili pravno lice, javni organ, agencija ili bilo koje drugo tijelo osim nosioca podataka, kontrolora, obrađivača i lica koja su pod direktnom nadležnošću kontrolora ili obrađivača, a ovlaštene su da obrađuju podatke.*

3.1.3. Iznošenje ličnih podataka u inostranstvo

Zakon nalaže da se lični podaci koji se obrađuju mogu iznositi u inostranstvo ili davati na korišćenje međunarodnoj organizaciji uz prethodno obezbjeđenje adekvatne mjere zaštite. Adekvatnost mjera se ogleda u vrsti, svrhi, vremenskom periodu, državi i njenim propisima, pravilima profesije i bezbjednosnoj politici države u koju se lični podaci iznose. Agencija u posebnim slučajevima može odobriti iznošenje podataka iz BiH u drugu zemlju koja ne obezbjeđuje odgovarajuće mjere zaštite (Brkić, Dizdarević, 2021). Isti autori navode da se to dešava u situacijama kada kontrolor u drugoj zemlji pruži dovoljno garancija u vidu zaštite privatnosti i osnovnih prava i sloboda pojedinaca ili kada prava i slobode proizilaze iz odredbi posebnih ugovora.

3.2. Evidencija ličnih podataka – zbirka

Evidencija ličnih podataka sadržava osnovne podatke o zbirci ličnih podataka i može se vršiti automatski ili ručno. Pravilnikom o načinu vođenja i obrascu evidencije o zbirkama ličnih podataka ("Službeni glasnik BiH", br. 52/09) određen je način vođenja zbirke evidencije ličnih podataka. U evidenciju se unose osnovni podaci o zbirci ličnih podataka koji uključuju: naziv zbirke, podatke sadržane u zbirci, ime kontrolora i obrađivača i poslove koji su im povjereni, svrhu obrade, pravni osnov, vrstu ličnih podataka, kategoriju nosioca podataka, izvor i način prikupljanja podataka, vrste prenesenih podataka, rokove za brisanje podataka i podatke o preduzetim mjerama zaštite ličnih podataka.

3.2.1. Glavni registar

Glavni registar ili elektronička evidencija predstavlja evidenciju o osnovnim podacima iz zbirke koje vode kontrolori, ima za cilj da informiše nosioce podataka o ličnim podacima koje kontrolori mogu prikupljati i na drugi način obrađivati. Uspostavljen je od strane Agencije za zaštitu ličnih podataka BiH, u skladu sa Zakonom o zaštiti ličnih podataka BiH ("Službeni glasnik BiH", br. 49/06) i Pravilnikom o načinu vođenja i obrascu evidencije o zbirkama ličnih podataka ("Službeni glasnik BiH", br. 52/09).

Kontrolori su dužni Agenciji dostaviti zbirke, prije dostavljanja, istoj moraju zatražiti zahtjev za uspostavljanje zbirke ličnih podataka prije bilo koje aktivnosti vezano za obradu. Nakon što primi zahtjev od kontrolora, Agencija pristupa provjeri obrade podataka vezano za određene rizike u vidu narušavanja osnovnih prava i sloboda. Dakle, radnje na obradi ličnih podataka počinju tek onda kada to odobri Agencija ili nakon isteka roka od dva mjeseca od dana primanja zahtjeva. Moguća je i prethodna kontrola Agencije, ali samo u slučajevima ako se:

- radi o obradi posebne kategorije ličnih podataka,
- radi o obradi ličnih podataka kojom se namjerava izvršiti procjena ličnosti nosioca podataka, a koja uključuje donošenje odluka na osnovu te obrade.

Agencija javno objavljuje evidencije, tako da su podaci iz Glavnog registra dostupni javnom mnijenju.

4. MJERE ZAŠTITE I NADZOR NAD OBRADOM LIČNIH PODATAKA

Vijeće ministara BiH, uz prethodno dobijeno mišljenje Agencije za zaštitu ličnih podataka BiH propisuje način čuvanja i posebne mjere tehničke zaštite ličnih podataka. Kontrolor, i u okviru svoje nadležnosti obrađivač podataka, brinu se o bezbjednosti i preduzimanju svih tehničkih i organizacionih mjera i utvrđivanja pravila i postupaka u cilju zaštite i tajnosti podataka. Sem ovih mjera i pravila, dužni su poduzeti i mjere protiv svakog neovlaštenog ili slučajnog pristupa ličnim podacima, mijenjanja, uništavanja ili gubitka podataka, neovlaštenog prenosa, drugih oblika nezakonite obrade podataka i mjere protiv zloupotrebe ličnih podataka. Takođe, u okviru svoje nadležnosti sačinjavaju plan za bezbjednost podataka u okviru kojeg svrstaju određene tehničke i organizacione mjere za bezbjednost ličnih podataka. Bezbjednosnim mjerama u planu bezbjednosti se osiguravaju:

- a) integritet,
- b) povjerljivost,
- c) raspoloživost,
- d) autentičnost,
- e) mogućnost revizije,
- f) transparentnost.

Veoma bitno je naglasiti da ove mjere ostaju na snazi i nakon obrade ličnih podataka.

Shodno Pravilniku o načinu čuvanja i posebnim mjerama tehničke zaštite ličnih podataka (Član 4.) kontrolor ima dužnost da osigura organizacijske mjere zaštite ličnih podataka koje obuhvataju:

- informisanje i obuku uposlenika koji rade na obradi ličnih podataka,
- fizičke mjere zaštite radnih prostorija i opreme u kojima se vrši obrada ličnih podataka,
- spriječavanje neovlaštenog umnožavanja, kopiranja ili prepisivanja ličnih podataka,
- uništavanje ličnih podataka i druge mjere.

Članom 5. ovog Pravilnika propisane su i posebne tehničke mjere zaštite ličnih podataka. Za njihovo provođenje takođe je zadužen kontrolor. Posebne tehničke mjere zaštite ličnih podataka obuhvataju:

- kontrolu pristupa prostorijama i opremi za obradu ličnih podataka,
- zaštitu od uništenja i oštećenja ličnih podataka i druge sigurnosne mjere.

Nosilac podataka kada uoči nepravilnosti ili posumnja da su mu kontrolor ili obrađivač povrijedili privatnost u bilo kojem trenutku može Agenciji podnijeti prigovor radi zaštite svojih prava.

Agencija, na osnovu prigovora donosi rješenje i dostavlja ga podnosiocu prigovora i kontroloru. U skladu sa odredbom (Član 41.) pomenutog Zakona prilikom uočavanja nezakonite obrade podataka Agencija nalaže kontroloru da prekine tu obradu, te zahtjeva nove mjere.

Kontrolor tom prilikom bez odlaganja preduzima naložene mjere i o tome u roku od petnaest dana pismeno obavještava Agenciju. Agencija ima ovlaštenje da od kontrolora ili obrađivača podataka zahtjeva informacije o bilo kojem pitanju i da vrši kontrolu nad bilo kojim dokumentom i evidencijom u kojim su sadržani lični podaci.

Protiv rješenja Agencije nije dozvoljena žalba, moguće je samo pokretanje upravnog spora kod Suda Bosne i Hercegovine.

5. ZAKLJUČAK

27. aprila 2016. godine EU je donijela Uredbu 2016/679. Uredba se odnosi na zaštitu pojedinaca u vezi sa obradom ličnih podataka i o slobodnom kretanju istih. Ovom uredbom stavljena je van snage Direktiva 95/46/EC. Glavni ciljevi Uredbe su vraćanje nadzora građanima nad njihovim ličnim podacima, kao i da se pojednostavi regulatorno okruženje za međunarodne korporacije ujednačavanjem propisa u cijeloj Uniji. Takođe, ovo se odnosi i na zemlje kandidatkinje za članstvo u EU. Uredba je objavljena u Službenom listu EU 04.05.2016. god., na snagu je stupila dvadeseti dan od dana objave. Iz navedenog proizilazi odgovor na prvo istraživačko pitanje. Dakle, primjena Zakona o zaštiti ličnih podataka odnosi se na sve građane, kako građane članica EU tako i građane država koje imaju status kandidata da to postanu, što je svakako i Bosna i Hercegovina. Sem građana, Zakon se odnosi i na korporacije.

Drugo istraživačko pitanje je glasilo: Pod čijom je ingerencijom zaštita ličnih podataka u BiH? Odgovor na ovo pitanje opširnije je predstavljeno u prvom poglavlju. Agencija za zaštitu ličnih podataka je samostalna upravna organizacija i jedina je nadležna i odgovorna za prikupljanje i obradu ličnih podataka na teritoriji BiH. Za svoj rad je odgovorna Vijeću ministara BiH.

Hipoteze, kako generalna tako i pojedinačne potvrđene su kroz analizu sadržaja Zakona o zaštiti ličnih podataka i predstavljene u samom radu. Lični podaci predstavljaju temeljno pravo na privatnost koje je kao takvo propisano i garantovano samom Konvencijom o zaštiti ljudskih prava i sloboda, što potvrđuje generalnu hipotezu.

Pojedinačna hipoteza 1. je dokazana kroz Član 4. ovog Zakona. Zakon striktno propisuje da poslove obrade ličnih podataka mogu vršiti samo kontrolor i obrađivač. obrađivač može prikupljati lične podatke i vršiti obradu samo u skladu sa ovlašćenjima koje mu da kontrolor. Član 4. i Član 5. Zakona potvrđuje pojedinačnu hipotezu 2. Kontrolor sačinjava plan bezbjedonosnih mjera kojim se štite lični podaci. Plan stupa na snagu onda kada se sa njim usaglasi Vijeće ministara BiH.

LITERATURA

1. Brkić, K.; Dizdarević, S. 2021. Korporativna sigurnost, Evropski univerzitet Kallos, Tuzla.
2. Evropska konvencija o zaštiti ljudskih prava i sloboda, https://hr.wikipedia.org/wiki/Evropska_konvencija_o_ljudskim_pravima, pristupljeno 03.01.2022.
3. Ivandić Vidović, D.; Karlović, L.; Ostojić, A. 2011. Korporativna sigurnost, UHMS, Zagreb.
4. Opšta deklaracija o ljudskim pravima, https://www.ombudsmen.gov.ba/documents/ombudsmen_doc2013041003050667cro.pdf; pristupljeno 03.01.2022.
5. Pravilnik o inspekcijskom nadzoru u oblasti zaštite ličnih podataka, ("Službeni glasnik BiH", br. 51/09).
6. Pravilnik o načinu čuvanja i posebnim mjerama tehničke zaštite ličnih podataka, ("Službeni glasnik BiH", br. 67/09).
7. Pravilnik o načinu vođenja i obrascu evidencije o zbirkama ličnih podataka, ("Službeni glasnik BiH", br. 52/09).
8. Pravilnik o postupku po prigovoru nosioca podataka u Agenciji za zaštitu ličnih podataka BiH, ("Službeni glasnik BiH", br. 51/09).
9. Zakon o zaštiti ličnih podataka BiH, ("Službeni glasnik BiH", br. 49/06, 76/11, 89/11).